

## LYNE, HORACE SAMPSON (1860 - 1949), llywydd Undeb Rygbi Cymru 1906-1947

**Enw:** Horace Sampson Lyne  
**Dyddiad geni:** 1860  
**Dyddiad marw:** 1949  
**Rhiant:** Charles Lyne  
**Rhyw:** Gwryw  
**Galwedigaeth:** llywydd Undeb Rygbi Cymru 1906-1947  
**Maes gweithgaredd:** Chwaraeon a Gweithgareddau Hamdden  
**Awdur:** Gareth W. Williams

Ganwyd yng Nghasnewydd, Mynwy, 31 Rhagfyr 1860 yn fab i Charles Lyne, maer y dref yn 1856 ac 1884. Addysgwyd ef yn Plymouth a'r Royal Naval College. Cyfreithiwr ydoedd wrth ei alwedigaeth. Chwaraeodd dros glwb rygbi Casnewydd fel cefnwr yn 18 oed, ond fel blaenwr deallus yr enillodd ei blwy fel capten y clwb 1883-84, a 6 chap dros Gymru 1883-1885. Fel cynrychiolydd y gêm yng Nghymru, bu'n un o sylfaenwyr y Bwrdd Rygbi Rhyngwladol yn 1886-87, a bu ei wasanaeth iddo'n ddi-dor, 1887-1938. Bu'n llywydd urddasol Undeb Rygbi Cymru am gyfnod hwy na neb. Ef a [Walter E. Rees](#) a lywiodd rhyngddynt faterion rygbi yng Nghymru gydol hanner cyntaf yr ugeinfed ganrif. Bu'n amlwg ym mywyd cyhoeddus Casnewydd, ac urddwyd ef â rhyddfraint y dref yn 1934. Penodwyd ef yn ganghellor Esgobaeth Mynwy yn 1938, a bu'n aelod o Gorff Llywodraethol yr Eglwys yng Nghymru. Bu farw 1 Mai 1949 yng Nghasnewydd.

### Awdur

Yr Athro Gareth W. Williams

### Ffynonellau

David Smith a Gareth Williams, *Fields of Praise. The official history of the Welsh Rugby Union 1881-1981* (Caerdydd 1980) (1980)

*Western Mail*, 2 Mai 1949

*South Wales Argus*, 7 Mai 1949

### Darllen Pellach

Erthygl Wicipedia: [Horace Lyne](#)

### Dolenni Ychwanegol

Wikidata: [Q3140461](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

